

格齋四六

王子俊

文碩閣

wenshuoge.com

目录

关于我们	3
提要	5
格斋四六	6

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案格斋四六一卷宋王子俊撰子俊字才臣吉水人官成都帅幕尝従杨万里周必大防为代草牋奏书记二人延誉於朱子朱子书格斋二大字遗之所着有史论师友绪言三松类藁诸书俱已不传此书原本题作格斋三松集盖犹类藁中之一一种散佚仅存者朱彝尊曝书亭集有是书防称抄得宋本格斋四六计一百二首今检勘首数相同当即彝尊所见之本也杨万里尝评子俊之文谓史论有迂固之风古文有韩柳之则诗句有苏黄之味至於四六踵六一东坡之步武超然絶尘自汪彦章孙仲益诸公而下不论也其推重之甚至今其他文虽已湮没不复见而此集所载四六类皆典雅流丽卓然自成一家朱彝尊亦谓其由中而发渐近自然无组织之迹以之接迹汪孙洵可无愧色矣乾隆四十六年三月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

格斋四六

宋 王子俊 撰

表牋

光庙登极

贺皇帝

皇天佑宋洊逢揖逊之朝大人继离益茂延洪之业华夷胥悦天人大和【中贺】皇帝陛下圣敬日跻聪明时宪克勤克俭不矜夏禹之能乃圣乃神广运唐尧之德自毓元良之望允若神天之心属黄屋之倦勤顾青宫而与子臣邻环拱率百官若帝之初典礼交修辑五瑞如器乃复于皇声实横绝古今臣远守偏州亲见盛美虽莫陪朝著对扬天子之休第嘉与邦人讴歌吾君之子

贺壽皇圣帝

恭默思道乃倦矜勤付托得人亟授以政再见唐虞之相继力行曾闵之所难【中贺】陛下道塞堪舆仁覃动植退藏於密盖与天而为徒忧惕以兴宁以位而为乐世廓廓以无事功巍巍而不居遽兴周康释冕之心且笃长乐问安之孝允恭克让莫匪循尧惟一执中复以命禹蔽自九重之志光於二典之书某出守偏州获闻盛典曾是隆兴之进士敢忘藜藿向日之心愿祝圣人之遐龄少致犬马恋轩之意

贺太皇太后

圣子神孙本源有自盛德大业揖逊相承尊归长乐之朝喜溢灵椿之防【中贺】窃以厘降妨汭莫逮与子之讴思齐大任弗暨广声之世未有再见唐虞之相授躬行曾闵之所难袞冕两朝同持壽筇车书万国咸得懽心振古所无於今剏见太皇太后柔仪天稟陰教日隆周南王化之基仪於四海明德大练之服燕及六宫烝哉积善之祥啓乃重明之运以天子父来殫就养之勤惟地埶坤永载无疆之福臣叨承一障喜遇昌辰不惟嘉与邦人同跻仁壽之域又将推广上意益覃孝爱之风

贺皇太后

尧父舜子增光虞典之书文德武功推本思斋之圣允极敷天之养式彰文母之尊懽声所覃薄海如一皇太后仰承宸极俯尽坤仪寶老氏之俭慈率先九御流闕雎之风化追配二南当上圣之倦勤挈洪图而与子地无私载顾岂以九州四海而自居天有常亲将俾之万有千歲而未艾此举之懿古人所无某属守郡符与闻盛事亦老吾老以陶锡类之风匪今斯今长致

后天之祝

贺肆赦

厯数在躬溥万年之景命雷雨作解洽四表之懽心凡蒙一洗之恩皆囿重熙之化皇帝陛下圣由天縱德乃日新毓德春宫恪谨文王之视膳非心黄屋适逢虞舜之倦勤勉承不再之言嗣守无疆之厯蠹兹有众孰非壽皇所养之民咸与为春俾沐嗣圣惟新之泽肆推旷荡之典以答遐迩之心恢然天地之施生鼓以风雷之号令臣叨守下郡与宣寬恩躬遇继离之明不私临照喜偕扶杖之老相与讴歌

光庙册后

贺皇帝

日有重轮已见承尧之虞舜月无私照又符兴夏之涂山礼肃宫闈懽摇海岳【中贺】陛下嗣膺大统祇奉圣谟矜问安侍膳之余亲承慈训俾求贤审官之助正位长秋蕩然二南之风施及四方之遠臣兹焉宣化乃尔逢辰陰阳既和年谷有顺成之望夫妇以正室家无愁叹之声

贺壽皇圣帝

已释重负犹深燕翼之谋俾建长秋以谨齐家之法事闕九庙懽动四方陛下宅帝倦勤顺天与子嘉乃丕绩既深亮其有不争功不争能之心惠于宗上又欲使之得罔时怨罔时恫之福乃涓谷旦俾正柔仪翬翟来朝共阐圣人之孝风教所逮益隆王化之基臣出守偏州恭承明诏家道正而天下定幸当极治之朝人伦明而小民亲是亦承流之幸

贺皇太后

天锡眉壽亲见尧舜禹之传世有徽音追配姜任姒之盛有华象服来覲慈闈皇太后母仪三朝表正九御称觴上壽聿来冕旒翬翟之尊含饴弄孙益介山阜冈陵之福臣假守遠郡获闻盛仪诵思齐之诗不谓适当矜今日祝金母之算所愿不老矜后天

贺皇后

倪天之妹行坤顺以无疆如月之恒配离明而并照事闕宗社懽动华夷恭惟皇后陰教聿修柔仪允正大任京室之妇惟思媚矜周姜明德大练之衣以奉承矜陰后光膺寶册董正宫闈闕睢王化之基载严正始之道既醉室家之壺永底太平之期臣假守偏州获聆盛典职当宣化忻逢人伦正朝廷治之时气可致祥又有陰阳和风雨时之望

重明圣节

贺皇帝【代杨待制】

占长发之祥具晓天休申命之意授泰元之防殆非人力所致之符宣时载夙之辰对越无疆之庆恭惟陛下聪明天縱圣敬日跻受汉岳之三呼答扬景命敛箕畴之五福敷锡庶民矧侍慈闱并受遐祉我百尔九十何啻梦龄之期心一臣三千同致后天之祷照临所及扑蹈攸同臣身堕江湖名在簪橐望蓬莱之云气虽莫陪鹓鹭之班奉瑄玉於竹宫幸获祝乾坤之筭

贺皇帝

亦惟纯佑是开震夙之祥肇锡嘉名丕闡离明之照懽腾四海若出一词陛下舜典克從禹中允执天畀所覆是以显生商之符日宣重光矧复纂体尧之运庸纪诞弥之旦以对无疆之休臣邈在偏州与闻盛典虽莫陪迓列奉汉殿万歲之觴第欲效小忠上唐臣千秋之录

贺壽皇圣帝

心一臣三千愿纪嘉名於盛际我百尔九十盖申景命於前规时哉索震之辰展也继离之义陛下循尧之极蹈舜倦勤绥眉壽而及皇天克昌厥后貽孙谋而燕翼子无疆惟休迨聿崇虹渚之符兹益见龙楼之庆臣与闻盛典邈在外庸录千秋于九龄之书曾未有金鉴之作呼万歲於两仪之宴防当见颺利之擒

贺壽圣皇太后

渚虹啓圣光开万世之休 颺生民殊非一日之积瞻言此举厥有自来殿下应地无疆后天不老周姜思媚驯致武王之生有娥方将是开相土之烈亲见神孙之嗣服载光初度以锡名臣假守孤城兹逢盛旦不但喜箕畴之福敷锡庶民又将赋周颂之篇亦右文母

贺壽成皇后

重离明而丽正丕昭继照之期履帝武而敏歆寔肇生民之福粤惟显号侈乃昌辰若稽积庆之源休有发祥之自殿下表正九御母仪两朝太姒嗣徽音本支百世王母坐少广壽考万年肆令节之纪名亶慈闱之燕喜臣兹焉乘障乃尔逢辰虽未纪唐臣之风来上十篇之事鉴所幸托虞帝之化以得万国之懽心

皇子降生【代杨诚斋】

贺皇帝

穹祗隤祉将延洪过厯之占弓韉应祈庸对越承祧之任事關九庙懽洽四方陛下灵承天心
骏惠祖武民胥嘉靖皆效华封之祝尧神无怨恫靡俟高祿之祠汉笃生元子式应熙辰臣不
谓凋年见此遐福身虽老矣子孙与有於荣懷心寔忻然手足不知其舞蹈

贺太上皇帝

圣人退藏於密决焉与子之谋上帝申命用休祚以抱孙之喜人胥相庆情不自胜陛下文显
丕谟汤垂后裕巍巍荡荡自晦则天之功名穆穆皇皇诞啓宜君之孙子笃生岐嶷之质益固
延洪之基永孚邦休显有祖烈臣官縻荷橐臈在祝厘无疆惟休岂但为熙朝之贺不显亦世
又以假后裔之灵

贺太皇太后

于皇景铄啓乃承祧之英长发灵源亶惟积善之庆仰止无疆之壽见此滋至之休下逮遐荒
举同抃蹈【中贺】窃以有娥立子不闻宅至养於四朝明德弄孙未有闋元嗣於五世赫是
盛美旷无前闻殿下厚德郅隆徽音逾永备时五福坐享万年之期實是一慈陰格三灵之佑
肆哀嘉庆以啓元良穹昊俾昌兹复见天子之子遐齡未艾更将抱元孙之孙臣逖闻荣懷采
深忻舞虽奉瑄是职乃不待高祿之祠第擊壤攸同以自慰华封之祝

贺皇太后

天惟纯佑嗣开万世之休神罔时恫殊非一日之积瞻言以喜厥有自来懽声所覃薄海惟一
殿下柔嘉维则淑慎其仪母慈妇顺之兼隆軼於今古人心天意之叶贊施及后来相时主鬯
之懽想见抱孙之喜某官维持橐臈在祝厘无疆惟休岂但为国家之贺不显亦世又以假子
孙之灵

贺太上皇后

月无私照方助成与子之谋星有重晖乃不负防孙之愿庆關九庙福萃重亲殿下应地无疆
后天不老周姜思媚驯致武王之生有娥方将是开相土之烈亲见神孙之岐嶷郅隆寶祚之
炽昌臣堕在山林践修香火不但起华封之意请祝圣人又将歌周颂之篇亦右文母

贺皇后

坤元底顺昭格三灵之休震索发祥上關九庙之庆照临攸暨抃蹈丕同殿下外惠宗公内隆
陰教神罔时怨有开熊梦之占天惟显思於赫 图之福肇允元良之望寔覃岐嶷之资邦永
孚於休民亦职有利臣身虽在外喜则由衷稽首汉殿之觴虽莫参於鹓缀倾耳尧门之瑞寔
深激於葵心

孝宗大祥【代杨诚斋】

慰皇帝

钻燧洊经於改火尚深追慕之懷弹琴未忍於成声勉徇祥除之制陛下皇图是荷祖武斯绳一日万防率循兢业之攸训三载四海寔均遏密之至情逮兹即吉之辰谅有无穷之感愿蹈立中之制益光润业之传

慰太上皇帝

歲籥洊更恍如过隙祥琴甫御惨不成声勉遵改服之期未慙终身之慕圣安仁壽皇帝陛下继文广伐蹈舜倦勤三年称情而立文下徇居庐之礼百官承式而稟令因决与子之谋迨此既祥之余犹有愈迟之痛愿抑情文之感式慰臣子之心

慰太皇太后

逝川沄沄怅仙遊之莫返阅日鼎鼎恍歲律之再周怅然余恫蹈此中制殿下情钟慈极仁惻宸衷万乘天临緬懷法驾之致养三年电过忍聽祥琴之成声惟深思礼制之有终以益介壽昌於未艾肆令宇县永有母仪

慰皇太后

望苍梧之峯愈觉音容之遠推黄道之日再见经躔之周尚深送往之哀勉徇荐祥之制殿下性钟地顺痛切天防锦欲衣而弗安何意亟陈於象服禪虽垂而勿乐忍闻复奏於霓裳抚缀衣而增懷感流光而永叹惟兹臣庶皆蕲慈抱之少寬俾尔炽昌以相遐齡於有永

慰太上皇后

日月其除奄暨荐祥之制琴瑟在御肇开遏密之音亶时至情尚有余慕殿下母仪寰宇妇顺历年佳妇佳儿永懷昔者之付托厚恩厚报忍即今兹之祥除谅深追孝之悲犹溅感时之泪愿体复生之节庸肩介壽之期

慰皇后

日月逾迈奄易服以荐祥雨露既濡尚感时而溅泪余恫未慙寰宇丕同殿下夙谨柔仪共宏孝治三圣相授一道陰相九重之纂承四海遏密八音已毕三年之礼制愿抑无穷之感以绥滋至之休

郊祀【代黄竹坡】

贺郊祀礼成

严恭自度罄丹宸之纯诚緼豫为纷辑紫坛之熙事四方来贺万福攸同协气塞乎堪舆欢声
摇乎海岳陛下聪明时宪圣敬日跻肇新万化之原敷锡庶民之福夕烽息警人皆耒耜之毗
秋稼登场家有仓箱之积载念降康之自聿严报本之祠多士骏奔赞丕天之鉅典千童罗舞
陈昭代之弥文咸秩百神大賚四海臣从违北阙隔在西陲涓选休成幸获再逢于盛际肃雝
显相莫繇一覩於禋容第偕扶杖之民同泳漏泉之泽

贺郊祀肆赦

葳仪吉土敬共三歲之祠肆眚端门敷锡庶民之福涣发风雷之号沛为雨露之仁凡在照临
举同庆赖窃攷圣人之飡帝盖承天意以惠民隤祉发祥具获灵明之博赐赦过宥罪是覃汪
濊之湛恩陛下道冒堪舆恩柔动植邊鄙不耸皆为来王来享之人年谷顺成复见多黍多稌
之世爰对一阳之律载祇八陛之坛昭升于天聿严熙事有秩斯祐燕及函生臣墮在遠方获
闻盛举莫陪多士执笾豆以骏奔第与遠民想笙镛而兽舞

册太子【代竹坡】

贺册皇太子

春宫贰极有开震索之祥寶册扬庭庸鼓巽申之号庆闕九庙风动四方陛下尧大难名舜恭
允塞天职覆地职载莫喻休功月重轮星重晖盖图大计眷乃承祧之重居无在傳之勤爰涓
选於刚辰俾光膺於殊礼临轩出令示一人有庆之符主鬯得人兆万世无疆之福照临所逮
颂咏惟均臣昔参琦皓之防今辱严徐之侍灵源暨遠子孙与有於荣懷扑愰发中手足不知
其舞蹈

进书

代进光宗御集

云汉为章莫閔寶储之彩风雷作号俾繙金匱之藏勒成一经昭示万世【中谢】窃以圣人
肆笔初何意於成书天下观文乃有功於范俗繫隆昭代遙骏先猷恭诏编摩之臣彙列昭回
之次焕然可述施及无疆恭惟光宗皇帝学富月将圣高天縱得书之体得言之解上掩百王
如日之升如月之恒下饰万物畴昔燕闲之御從容翰墨之場周文郁郁乎宏賁盈成之治虞
书浑浑尔丕昭精一之传陛下声欲广文道能继禹作者之谓圣敢忘继志述事之心得其所以
书洞见经天纬地之妙肆命臣工而纂辑载扬帝典之光华緜帙縹囊寶为大训赤文绿字
皆聚此书臣等猥以謏闻膺兹隆旨玩歲愒日空殫浅见於管闕血指汗顏深觉圣言之天遠

代进重修七司令

制而用之谓之法所期合古而便今变而通之存乎时当亦举偏而补弊立为成宪允属昌辰肆令亿兆之心具晓画一之意【中谢】窃以着为律防为令要皆所以范民作者圣述者明亦共图於经世必揭始观之象用陶不倦之民以时纂修为世检押陛下尧纲具举舜法可传左防右矩前準后绳以为民极详法畧则本数末度则有司存粤徙寶厯之绍承咸仰圣谟之宏遠五服薄四海臂使指而毕徙八统御万民网在纲而不紊犹恐弊生於所忽殆将功败於已成爰制诏於臣邻俾科条於令甲布在方册允厘百工鳬居鴈聚之浩繁同归於治金科玉条之明白可举而行勒成一代之书庸示九围之式臣等赋材庸薄庀職凌兢继晷穷年空玩歲日而何补奉命承教乃得圣王而为师维幸及於奏篇犹未知於免戾

杂谢

代湖北宪谢到任

剖符起废已愧饶逾持节观风又叨临遣星言于迈夙次所临伏念臣草芥人防斗筭器小绅笏三十载何有寸功风波千万端止欠一死曩丞棘寺出守山城谗言骤兴政坐过客厨传之故公论既定复见中天日月之明方拜命於州麾忽防荣於指使惟是重湖之外实连三楚之区民杂蛮獠地控邊锁渺焉蒲泽之深阻甚者潢池之绎骚自非酌寬猛之宜是必负澄清之寄有如 拙曷称使令兹盖伏遇皇帝陛下蹈舜好生传汤祝网欲妙按临之选以将钦恤之仁谓使过贤於使功将观后效而聽讼不如无讼何必能声臣敢不循行郊原延见父老道上德意俾各懷自爱之心问民咸休勿使有多暴之俗

代谢赐厯日

居卿底日虽古人厯象之常后天奉时乃圣主弥纶之化惟时颁朔于以授民星正仲春不失省耕之序阳居大夏仰体好生之仁承流之臣抚心知幸【中谢】恭惟皇帝陛下循尧之道行夏之时履端归余上斡周天之度务农重谷下底蒸民之生肆於正歲之初严乃清防之课布在方册允厘百工臣敢不布宣寬书劝相农畝諭以上意靡容帝力之不知寬其力征抑使农时之无失

知成都谢到任【代竹坡先生黄畴若应蜀中文字并同】

掌邦教於迓聯畴庸弗效殿帅藩於遠服闻命若惊亟懷綬以遐征已褰帷而涖止具以朝廷寬大之意告诸田里愁苦之民【中谢】伏念臣一介妄庸半生艰苦饥寒不恤姑为投牒覓举之谋州县徒劳不作结綬登畿之梦试邑偶逃於吏议入京遂厠於朝行歲月推延驯至上当於言责风波横潰防何不蹈於甌机保全迄赖於皇慈猷纳晋陞於禁路奉云阳之瑄玉莫输许国之忠问杜曲之桑麻渐起归田之兴属庙谟之经遠移制幕以改弦掖垣忽误於出纶井络遂徙而分阨蕃锡有加於彝典察廉旁暨於邻封仍防次对之恩增重十连之寄宠逾深而莫报责愈重而难胜陛下天拱一堂子来万宇不泄迹不忘遠要皆如出於京畿在知人在安民是以不轻於牧守不责催科之巧寧无惓惓之华晷时纯愚蒙此临遣顾惟四境颇异平

时内而闾阎凋瘵之弊深外则羗獠招懷之道阙一龙蛇一赤子人谓斯何为保鄣为茧丝防将安出岂繄绵邈所克堪任臣惟当精白一心展布四体既庶矣加之富矣愿遵洙泗之言欲安之非以胜之或收渤海之效

谢安边所结局转官

币余制用偶逃旷职之诛诏防防荣忽冒茂官之典宠光所逮震叠靡寧伏念臣顷污朝行适尸言责谓迷国之渠已去死有余辜而和戎之利复成责将安出要当取没入之产以定为聘好之常勾稽下及於至防渗漏靡容於它罅不图管见辱被帝俞亦令防臣忝董乃事迄有涓埃之补稍符粪土之言皆由圣主听纳之明是能底绩至若有司出纳之吝何足言劳敢图湛恩肆陟彝典陛下驭周八柄励舜庶明谓善至小而不遗乃能示劝赏或疑而從予所以广恩虽去国以遐征亦陞华而下拜臣敢不推广此意抚摩所临节用爱人庶图田里富足之效画圻固守抑体廊庙招懷之心

谢宗祀礼成加封邑

合宫藏祀奉瑄莫与於骏奔温诏防恩锡美顿增於邑入骤膺宠渥莫喻凌兢伏念臣奋自闾阎偶靡簪绂不稼不穡岂宜多取於禾困是藁是穰第欲归安於农畝密迹一纯之荐适为万里之行不图厘事之告成亦衍畚田而拜赐陛下心存寅畏德务寬仁堂秩几筵极天地鬼神而昭格恩覃四表举輝胞翟閭而不遗肆令防臣亦叨大賚臣敢不仰銜厚施俯究愚衷因遨遊以省耕无非事者罄勤拙而尽瘁不素餐兮

谢加龙图制因任

分阃罔功恐坐黜幽之典出纶有命忽叨进律之除是何宜斥而反迁籍甚以荣而为惧牢辞不获重拜靡遑伏念臣蚤窃儒科晚尘禁從民曹经幄殊深非据之慚松径菊篱屡起归休之梦偶值一城之谋帅俾承芝诏以充员属干戈甫定之余而杼轴已空之久虽勤拙相补里闾稍稍安之然衰病交侵精力駸駸愈矣方上祝厘之请敢图锡命之荣误恩俄被以龙光宠秩载腾於凤检榦方井里已寬廷尉之诛候对松阶更冠寶储之首陛下天临广宇子视遠民察知几案之小材寔维簪履之旧物虽政拙自注下考仅输抚字之劳而赏疑所以广恩式彰忠厚之意但臣弩材素下防技已穷深虞末路之难并使前功之废敢不益鞭其末图谨厥终抖擞精神勿蹈亏功之戒逍遥田里终期從欲之仁

谢平蛮转官

反獠告平仅塞榦方之责恩纶骤至例防进律之荣循墙莫遂於牢辞躋地不胜其陨越臣顷承異命出帅坤维封陲遠控於三边忧责独深於诸道稽小丑干诛之故狃积年弛备之余爰飭所临俾固吾圉先为不可胜盖守臣镇抚之常则莫我敢承亦廊庙威灵之素以至师徒之薄伐又皆将士之宣劳如臣之愚何力之有乃拜九重之睿渥使升一等之文阶僥逾若斯报

称安所陛下如天覆帟若日照临達虞舜之四聰而靡有遐遺謹周王之八柄而不容幸与察臣虽无善最或能歲讞而有余欲臣少慰穷涂是以赏疑而從予肆頒恩施以賁衰殘臣敢不仰体隆私益图末路龙光所逮固当更效於糜捐防技已穷终冀退安於闲散

谢加直学士再任

遐陬分阃踐更久过於瓜期遽閣陞班申命复煩於芝檢山川如旧宠渥惟新循墻力控於忱辞出紉莫廻於成渙伏读温诏益震危衷伏念臣结纳无奇侵寻已老入持禁橐论思莫效於嘉猷出帅藩方抚字第勤於拙政方凋瘵疮痍之未复嗟劳徠安集之良难虽几案龔材或谓颇堪於烦使而蒲柳弱质其如已迫於凋年曩尝力控於封章止愿退安於闲散乃俾解装而承乏且蒙进律以防荣日往月来倏已复周於歲籥心勦形瘵惟忧寢蹈於官箴投诚方窃於丐归有识咸讥其已晚敢谓峻除於寶度居然就抚於油幢深虞并废其前功无以仰承於睿渥陛下天临百辟器使群工欲使蚕丛鱼鳧之区如在丰镐鄠杜之侧肆綏遠服重简渊衷谓道州之考何长姑令抚字而许丞之聳不去可免送迎晷时頽堕之踪假此斯须之宠臣敢不恭承明命罄竭謏材老马力疲末路分甘於伏枥穷猿意迫归心第切於投林

谢东宫赠金杯纈罗香茶

令出震维念屢簪之遐弃恩施晋锡旅器币以下頒偕寶薰名焙之多假暮景穷途之宠整襟下拜刻骨靡忘伏念某饮则一瓢衣维百结身縻朱墨无心燕寝之清香梦绕家山雅意故园之双井赐予忽来於天上芳珍复絶於人间妻孥罗拜以感藏父老聚观而赞叹殿下诚存洞酌善取緇衣奉鬯陪祠休有惟馨之德问安决防居多有味之言尚怜流落之踪首辱從防之旧爰下便蕃之贐俾为衰晚之光某惟当沉酣隆私被服嘉惠祝万年之遐筭誓将求香火之祠生两腋之清风更冀适山林之愿报将安所言莫能宣

宰相

代贺留右相【正】

伏审大廷涣号亚辅防荣士勛相我国家岂轻其选王寅诸其左右今得其人纶言一頒国势益壮某官道隆而德备才鉅而能全解牛十九年而殊不更刀溜雨四十围而曾无改节不为俗学再还庆厯嘉祐之风自结主知早侍上清虚皇之侧舍人様生光於鵷鹭尚书履径上於星辰入殫论思献纳之忠出课慈惠循良之最随其所到休有可书朱帘卷雨画栋飞云尽领洪都之胜连峯去天枯松倚壁不辞蜀道之难召诸天梯石栈之间参乃钧府枢廷之贰载调元化益峻岩瞻盖方其左朱轡之时已繫苍生之望迨此右臯陶之选皆叹白麻之迟风雷之号一传天人之心交喜不动声色固已见歲时无易百谷用成益究设施要当使钟簴不移庙貌如故某寸长何有一障是乘嘉与闔境之人同囿洪钧之化使民安田里其孰非吾君吾相之恩政拙催科殆必免大譴大呵之域

代贺史丞相转光禄大夫进封鲁国公

恭审孚号大廷防荣显渥刺经作制勒成颢噩之书胙土苴茅奄有 蒙之境仍稽典故峻陟文阶金章式焕于民瞻采地增陪於邑入册命一下懽声四驰恭惟某官道冒古初功存社稷洪钧转一气乾坤日就於清夷庶绩抚五辰星宿亦为之明润自赞解弦之化益隆调鼎之勲年谷顺成和气旁行於农畝遠人咸慕夕烽不到於邊城坐令薄海内外之人如在先朝全盛之世爰辍秉钧之暇定为画一之防合古便今可通行於万世举纲撮要以明示於黎元爰涓选於良辰庸彻闻於黼辰肆覃茂赏载答显庸登进厥民在王庭俾闻播告永弼乃后于彝宪勿替钦承嗣膺维师尚父之尊有光先正保衡之烈某心驰恩地迹滞侯藩灵丹就而鸡犬俱仙敢萌荣望大厦成而燕雀交贺空激抃惊颂咏弥勤科条莫既

执政

代贺王防政【藺】

伏审光膺宸渥叅秉政机黄屋倦勤岂遑暇世间之机务紫芝锡命乃登庸天下之正人岂非燕翼子之谋莫先求哲人之举臣有十乱武维用此而有余才如八元尧自相之而何害傥用儒之已尽斯释负以无忧豈惟我公能任是责某官才全而能鉅志大而气刚酌柱猷栋梁之规人为之惧披腹呈琅玕之蕴天亮其忠其在甘泉持橐之班已有傳岩调鼎之望顷從专阃促以赐环方班聽履上星辰之聯遽叅济川用舟楫之地进则云骤人犹恨迟然而受隆委於两朝下丞相之一等虽羣贤并命期共赓股肱庶事之歌然舆论所宗乃独任春秋贤者之责元气孰壮陰沴孰消樽俎笑谈何以折遐冲於千里之遠日月献纳必将举明主於三代之隆在此位而不为顧他人而何望公之自起庸可或轻某雅尝辱知不敢私贺所愿获见勲烈有如青史之所书则虽堕在江湖至於黄馘而奚憾

防諫

贺金察院

伏审光被宸恩擢司风宪雷行凤检方进登天下之正人霜肃乌台俾尽吐胷中之素蕴虽俯從人望寔断自天衷邮传欢动於四方国重顿增於九鼎恭惟某官高文作古雅望镇浮庖丁之刀十九年绰有余地孔明之柏二千尺谁识苦心政所去而见思材无施而不可顷自流钱之府往仪振鹭之羣子衿青青士有文武兼资之畧王臣蹇蹇帝思风节不挠之英遂飞渥於枫宸俾察防於柏寺邦朋屏迹雪见睨而自消善类寧居虎在山而不采顧念虽资於弹劾亦难久屈於徊翔风采凜然今已杜羣枉之门而开众正之路钧衡近止行当建万世之防而举三代之隆某猥以诸生伏读明诏身虽老矣恐无芝 蒸出之祥心则欣然犹有鸡犬俱仙之望抃蹈何极敷陈莫殫

贺郑正言除司諫

伏审就陟谏垣顿增国重皂囊奏防尚叅两省之聯黄纸除书遂正七阶之品人徯仁言之溥士知元气之还贊书一传輿言具穆恭惟某官修名盖代厚德镇浮金钟大鏞殆非近世之人物光风霁月绰有前辈之风流孤忠上简於龙光清贯亟跻於鹭序冠峨豸角陰见睨而已消手批龙鳞木徙绳而自直属时睿哲渴想忠规乃眷廷绅孰任尽言之责肆扬诏綍延登已试之英即畴底绩之庸行正告廷之命某猥分阃寄遥聴除音闻鸣凤於朝阳岂为私贺寄双鱼於尺素宜激扑惊

贺董秘丞除正言

伏审光奉制纶擢居谏省道山委竹帛已尽防四库之书闾阖呈琅玕乃进立七臣之列帝虚心而垂聴人侧耳以竦闻涣号一传师虞具穆某官高文作古奥学造防着玉杯繁露之书渊源遠甚繙金匱石室之作誉处翕然肆畴册府之英无出儒宗之右鵬抟羊角虽莫量迈往之程凤鸣朝阳要先展格心之业谅悉摅於贤韞以入告於辰猷坐令州县之民如在祖宗之世君子有所恃小人有所忌蔚为百辟之仪谏官可尽言宰相可尽行即兼二者之美扬庭之宠指日以须某雅辱旧防喜闻佳语贺厦欲同於燕雀莫遂下风寄书遠托於鳞鸿未殫扑悃

制阃

代通安大使【丙】

身无功状难从污鰐鹭之班帝有恩言俾往牧鱼鳧之国出国门而东鹳厯吉日其遐征惟遥瞻大幕府之宣威窃自比小诸侯之述职蒙成庶其免矣驰敬其敢后乎恭扣私门具陈忱悃伏念某学不适用材亡逾人身类蠹鱼生死不离於文字心如斥鷃飞抢止在於枋榆不图官职之推移浸被朝端之任使谋猷何有误差属车豹尾之间志愿无它已作闲馆珍防之梦偶值坤维之谋帅爰奉巽命以充负靖言差择之所由非有劳能之可录意其温恭有恪必能寅奉於教条察其悃悞无华或可惠绥於田里肆加临遣俾备驱驰自知不称於所蒙其若牢辞之弗获某官受天间气为国重臣手剪逆俦带砺遂盟於伟绩身当强敌金汤不在於长城相时社稷之大勲式简冕旒之隆眷徒得君重托西陲半壁之天行以公归扶黄道重轮之日尚怜孤拙曲借优容陰雨之膏黍苗深切煦濡之望广厦之庇寒士不胜归倚之私颂咏良勤敷陈莫究

安抚

贺龙兴帅赵龙图【善俊】

伏审光奉纶言移牧防府课殿邦之最谓宜寅诸左螭右掖之班宣制阃之威乃独领此南浦西山之胜虽小郁輿人之诵而坐回一路之春侧闻除书防至曲踊某官自天毓秀以学褫身河间大雅不羣所耽者古东平为善最乐自得於心早抟九万里之风荐试十九年之刃随其所到辄有能声畴清香画防之庸久膺选表寓寶文绿字之直奚足酬劳顷於龙焙之瀛益播

熊幡之誉一襦五袴万口一谈适大江以西谋帅之难而当今之选非公莫可画栋飞云朱帘卷雨端为湖山而一来横门开日高阁切星行厉云霄而却立某欣闻声猷积有年数幸甚部刺史班春之始得在小诸侯述职之中无一事以勤馆人空有懷滕阁之记如百谷之仰膏雨第请赋黍苗之诗时哉千骑之临正肃春光之丽幸无忽节宣之令实不胜颂咏之私

代王宪通荆南帅王枢使【藺】

起家乘障在初心犹切於吹蠶改命观风不自意何從而得鹿望寧到此贱不获辞式时方伯连帅之贤实惟紫枢黄阁之旧属尝有一日之雅谅不忘平生之言小草之依长松亦缘同味之故凌雨之得大厦厥有亢身之方愿卒相之其知免矣某官材全而能鉅志烈而气刚立朝堂堂真不清之冰雪论事凛凛乃羣枉之鷹鷂羽仪百僚夷险一节济川作砺不负武丁之简知破斧缺斨亦岂周公之加损起從词馆来殿帅藩以方叔之壮猷勤毕公之小物一路绵邈皆自得湖山之民重湖阻深无复有一蒲之盜行锡听朝之对遂登颺面之崇某以碌碌何足数之才蹈硤硤未必全之戒不图末路俾驾使轺幸列城已熟於教条而百姓亦安於田里蒙成足矣虽衣绣持斧以何施弛情炯然惟补剸息黥之是望

通贺安抚王侍郎

伏审出紼西垣作藩南服紫芝涂检方除言语侍從之臣潢池息兵所要诗书礼乐之帅姑辍孔鸾之侶来空猩兎之羣寬九重之顧忧为一路之司命某官学穷圣韞材应时需懷明月佩连城自全其贵羞昆仑薄员峤莫喻其高惟其已重而物轻是以身退而名进顷际解 之防实资曲突之谋亟其空臆以尽言翩然纳履而遽去阅时浸久忽公论之复明承诏来归举国人而胥庆方僖正人之巨用遂躋寰海之隆平适时群丑之陆梁俾蒞十连而镇抚亲屈元戎之乘并紆支郡之符先声一临士气百倍昔西羌未定范文正出以守边而贝州既平文忠烈归而拜相对於前哲是在我公凯歌才偃於旂于歲旱即为於霖雨某羈孤一介流落百罹雕虫篆刻乃壮夫之不为既无遭於场屋豫章橘柚非老人所宜种又絕望於荣涂归欵松竹之防已矣风云之梦不图疵贱之踪迹何自彻闻於縉绅外之部使者诵言其平生欲以为山林之劝内之卿大夫表出其所着姑少酬铅槧之劳方糜斗食於祠庭俄捧辟书於蜀道扞参厯井不胜行路之难披雾覩天乃失扞衣之便惟是子云之宅尚编渤海之氓近得乡里故旧之书具言父母岂弟之政为黎侯之赋遠景虽云未卜於归期從童子而歌中和亦能遥颂於风化其为归倚莫究宣陈

贺潭州卫防政【涇】

伏审勉從温诏起殿价藩袞衣绣裳尚郁归禾之命囊兜防蠹有严制阃之权坐令道林岳麓之间俱在春风和气之内某官道关百圣忠贯三精该孟韩於胷中独传正学起晁董於笔下遂甲大廷属听朝更化之元在独坐可言之地如农夫之去草先务絕其本根若歲旱之作霖爰寘诸其左右方僖登崇而颺面忽投闲散以均劳逮元气之稍迴果公论之自白赤舄几几曾何防患之伤方城临临忽畀藩宣之化邈是潇湘之境方罹蛇豕之妖疮痍未瘳反侧犹在

劳来安集暂烦天子之大臣辅赞弥缝行究贤人之远业某切聆明诏倍激扑惊齿豁头童犹是陶钧之旧物文卑书俗空陈竿牍之具文恭维歲律之向除殊觉寒威之未慙愿精调於鼎铉即归秉於机衡薪向良深科条弗究

漕使

通潼川漕谢太丞【代胡监酒】

青衫试吏方谋控地之飞绣节观风幸快披云之覩抚微躯而浩叹舍崇仍以安归伏念某鉉槩庸生箕裘冷绪焚膏油而继晷敢或怠荒居陋巷以致诚自甘穷约顾惟族繁俱业诗书走马看长安之花后先相继攀檻请尚方之劔风烈犹存自怜弩质之无堪长恐家声之之弗嗣属兴能於乡老偶防第於春官披腹而呈琅玕了无可采排云而叫阊阖咸笑其狂福寧望於庸庸科遂收於下下旋以携孥於甥馆逝将赋粟於坤维虽弛担之逾时曾择栖之无所乌鹊绕树怅三匝以何依鷦鷯巢林得一枝而已足不有贤德其谁主盟某官道觉先民文追古作吕梁飞水三十仞尽供笔下之涛澜庙柏溜雨四十围独傲歲寒之风雪顷者郅隆於朝望居然垂上於政涂兴懷忽急於防山丐外遂從而懷綬羞昆仑而薄员峤公则良高扶黄道而上紫微世将谁属竚看召驂归翊政机惟时水漕之小淹尚有铨衡之可托倘辱實門人之数寔足慰平生之心矧大贤何所不容而君子不可得侍冀获闻於一语以为法於终身断臂雪中谅不靳真传之秘漆身桥下其敢忘国土之知归倚良深宣陈莫究

通成都林运使

白头捧檄泝瞿塘滟滪以遐征绣节观风许櫺具步摇而入见矧是萍蓬之迹实连桑梓之陰阳公薰晋之鄙人亦复何殊於亲炙孔子思鲁之狂士固应颇喜其遠来是不虚为万里之行其庸敢废一牋之敬恭惟某官修名揭日高谊薄云斯文得所宗典则在元和之上所守一於正风流如庆厯之间稽其践扬休有誉处属者一麾之出守藹然五袴之兴謠选表来归谓即近长安之日乘輶于迈乃遥占蜀道之星惟干戈甫定之余正杼轴已空之候云屯万旅曾无赋敛之少加星拱九霄聿有声猷之上彻行拜芝泥之玺亟归玉笋之班某困顿数奇侵寻已老蹭蹬场屋其谁以吊於有司流落江湖已久无求於当世不期特诏录以微官身縻香火之祠梦绕蓬蒿之宅耕云钓月自分终焉厯井扞参何心到此偶故旧轸绨袍之念而荐书彤华袞之褒遂扶老攜防而一来盖蹈险履危之万状抚头颅而浩叹初亦怵然悔之望英蕩以焉依兹又幸之大者其为归倚莫究名言

提刑

贺李崇庆得乡节【 】

伏审揆日建防出节引道猩鼯夜嘯上貽廊庙之忧锦绣昼行中出玺书之宠仍寓寶储之直益增英蕩之华一闻邮置之传顿觉封陞之肃恭惟某官夙登列着力障頽波赵孟所贵能贱

之於吾何有孫劉不使為公耳枉已則非流落十年險夷一節疾風知勁草身自有於長城浮
云蔽太空世苦無於公論迨茲更化詭以作州藹然治最之旁行久矣召環之當至殺越人于
貨適值小夷干紀之秋修扞我于艱尚憶曩歲榦方之畧肆疇物望就駕使軺賁延閣以通班
過故鄉而上冢昔依寇叛而安道率家僮破賊貝州平而寬夫以相位酬庸參本末於兩公殆
前後之一轍式是恩綸之下拜居然天意之偶開適於此時忽降甘飭衛師興而致雨已示洗
清小丑之期商歲旱而作霖又卜歸服大僚之兆某情均骨肉迹阻門牆櫺具步搖反莫偕於
賀客距躍曲踊第深激於抃驚

代回利路毛提刑兼制參【午】

切審光膺睿渥就按祥刑下芝詔於西垣寵光茂甚泛星槎於南鄭風采凜然不妨大幕之運
籌并使全蜀之蒙福成命一布懽聲四騰恭惟某官厚德春溫貴名日起曩郁朝天之步來為
贊畫之賓留東閣以觀賢小淹遐武觀湖南而知客遂簡淵衷肆令咨度於皇華悉俾平反於
丹筆竚承迅召歸正要津某耳熟風猷神馳德宇能令公喜能令公怒曷勝借助之懷不自我
後不自我先適值建防之日欲陳賀悃莫究抃驚

提舉

通鹽使鄭侍講【喬代曾宰】

伏審輟從朝班出將使節誦文章之爾雅殆疑非近世之人望英蕩之光華乃辱在先驅之役
蓋平日精誠之感有今茲幸防之逢不自勝其忻抃之懷輒自見於竿牋之敬某官弥文作古
雅望鎮浮方其防舉子之場已不為嬌青配白之語及其奉彤庭之對乃盡吐薄云貫日之忠
溫然有說命三篇之風岿乎在漢庭諸老之右式是帝心之簡在亟從天祿以校鰲厚德有容
而不失其高中立不倚而非期於矯頽波方靡雖蕭傳亦有非望之慙砥柱不移獨宋璟聿為
難致之客深交不願於絳灌為公何有於孫劉旋剗劇於星郎之曹且繙經於春官之席皆主
知之自結何治最之弗優大為人望之攸歸金謂國鈞之伊迓奚云霄之已逼乃原隰之載馳
先聲所孚列城自肅羞昆侖而薄員峤姑遂來臨扶黃道而上紫微終當未免某少而筆硯偶
爾紳裳倒指半生之中若為把玩折腰百僚之底乃爾塵勞矧承竭澤之余尚深赧尾之慙催
科抚字莫知何防以兩全噓濡拊摩尚圖更仆而三請幸焉已甚言亦奚宣

郡守

代回建昌江守【自任】

駕行春之馬何至煩公分掃地之光是將及我寶鄰之側有人如此魚書之敬闕典可乎竟為
所先可謂不敏某官英標玉立雅望川流解牛十九年綽有余刃參天二千尺誰識苦心稽其
所臨具有可紀尚屈云霄之步來分銅竹之符解已妙於更張禁火便從而安作然而先一
州而後天下豈吾相心潤九里而福京師非異人任諒無暖席即有賜環某家連賜履之鄉官

托辅车之势故矜五袴之咏尤所饱闻藐是七防之章焉能尽写

代回郑贇州【汝谐】

已试畴庸维良作牧籍甚物望谓宜寘甘泉之班邈是侯邦岂其淹长者之辱维时邻境首丐余波自送旌麾之南日困尘埃之迫亦欲致鱼緘之敬以践修燕贺之懷竟为所先敢谢不敏某官长材伟世雅望轶羣粉省含香早出应郎官之宿江城画诺乃洊开刺史之天璽维责实之朝欲示重外之意复烦遐躅加惠价藩恐行促矜追锋殆不容矜暖席某偶冒分符之寄寔连赐履之邦披云覩天属已慰生平之愿扫地布席政有赖辉映之余拜嘉以还占言莫究

代通杨筠州【诚斋】

得请矜朝把麾矜外首石渠之选人犹为之屈称刺斗大之州今乃烦矜敏手提封幸甚輿诵谓何某官其学一出矜诚虽天亦亮其正每极言高论曾靡悼矜后害虽怨家仇人不敢诬其生平世亦岂无名流若此者防古之所谓遗直顾不在公雅薄圆壶之防自诡左轡之驾藹然儒者之政薰此区吴之民厥惟当今尚有公论顷收朝迹壤麻谁贷矜延龄比入荐书登位盖慙矜陈寔夫岂为丹鸡之诮亦自逃青史之讥以此占之岂从外者某竭来乘障政尔事贤属闻有行不觉永叹念逖间德宇何從闻防薤之规而讲问政声尚欲取伐柯之则

代诚斋迎贺赵守【希仁】

出紵西垣分符南服采诸人望久当寘紫橐之班邈是江城乃复枉朱轡之辱匪缘重外何至烦公先声一临和气百倍某官英标玉立雅望川流稽其存心要不出东平之善至於余事犹不减子建之才越從踐扬休有课最使者之星一出不待载驱而已孚刺史之天洊开岂应选表之犹未瞻言剧郡孰与是邦分共理之忧谁实任虎符之寄畴已试之迹要莫如麟趾之英肆令白粲连檣之区顿有紫气浮闕之望第恐促驰矜召节庸或不俟矜建牙某投老归欵受防惟甚焉敢切置盂水以效任棠之高第当自驾牛车勿负儿寬之殿惟一州徒得君重而千骑方以暑临其矜节宣之宜倍有劘毖之禱

代通问崇庆李校书

立朝无补猥分出守之符接壤相交乃获善邻之寶矧惟事契积有歲时聆伯氏之吹埵早知有親居是邦而友士无以易尧其矜修辞庸可愒日某官高文作古奧学造微由苏氏以来未有如公家父子兄弟之懿虽孔子复出亦当在门弟文学德行之科顷方從册府之防亟以忤柄臣而去道不容而何病名以退而益高使簞州麾所到咸书矜善最從班政地胡今尚鬱矜遠猷谅无暖席之淹即奉受厘之问式究贤业永弼治朝某祇若恩言抚摩凋瘵民亦劳止孰寬魴鱼赮尾之忧我仪图之惟有邻女分光之望心焉欲述口莫能宣

代回詹归州

庭集孔鸾尝竝防於朝路符分铜虎旋各把於州麾追惟倾盖之定交以至举觞而相属恍如昨日不知歲月之屢迁惠我好音方愧礼文之不敏恭惟某官文追古作学得真传立馆下招诸生方发青衿之药坐堂上称太守俄班皂盖之春坐令三峡之濱大喧五袴之咏先一州而后天下此岂宰物之心鼓元气而霑域中即聆选表之命某倦防甚矣决防归欤已办扁舟将过黄堂而欸语所忧召驂即随丹诏以趣还感荣问之先施布谢惊而莫究

代回嘉定李校书【 】

行春而驾一马内懷鶉特之慙遣骑而致双鱼中有珠玑之贐细哦此作足振吾衰某官世济方闻之材心传正大之学餐楚客之秋菊恐它馈之或伤织天孙之锦裳非今人所能到尚屈云霄之步来分铜虎之符燕寝凝香暂拥黄防而防卧璇题纳月即攀紫禁以上征某猥以剪材来临剧郡地如错绣所忻鸣柝之闻邾势若同舟当有余波之及晋欲报之惠莫究于言

回眉州安直阁【癸仲】

五马二毛帐已乖於壮志双鱼尺素骇忽拜於好音凜然骏气之横空写以名章之满纸高懷甚茂永好难忘某官家传贯日月之忠身被奄 蒙之锡赤舄几几蚤從周公之拜前方城临临剩喜西平之有子暂摄守符而共理即承帝命以为真某洗印云初课功何有受察遥瞻於大幕我所焉依同寅近托於邻封公无遽去

通判

代回潘倅【昌齡】

伏审已戒行李聿来赴 郡承游飢岂复执乐红妆之梦公为别乘适应浮闕紫气之占民曰乐哉吾事济矣某官才无施而不可政所去而见思入缀鸛鸾汔可慰輿人之诵游分风月竟莫晓宰物之心豈惟此邦尸以拙守必有王祥者出来咏海沂之功庶令宗资之流第画汝南之诺姑屈遠步来分顧忧某未遑名姓之通遽拜緘滕之辱州虽无螭乃有同寅协恭之贤书已得鱼况妙崇雅黜浮之体难忘永好莫报珍投感愧滋多占言未究

干官

代回许提干【可】

同桑梓之陰焉敢以乡丈人而自处帶櫛具之劔何以异部使者之见临辱先以书喜甚欲舞某官文追古作材应时须鸛凤卑栖初不叹枳棘之陋鳬鹄列进亦何妨松竹之吟兹以步摇之冠来贊圖法之府公亦屈矣乃久涉州县之尘我独跼然获再见州里之彦某竭来漫仕雅已倦防知子之来固不啻似人之喜道旧为乐意必有起予之言纾意良勤占辞莫尽

代回彭提干【扶】

拜州千里顧不材何以当之置水一盂非故人尚谁望者竭来访问乃尔乖离望梅岭以兴懷
抚鳞緘而增叹某官早從里选遂以文鸣九万里之抟风了无余子十九年之防刃绰有能声
岂青衫旅荷叶之枯而黄本缓石渠之校带櫪具劒岂从为暴使者之賔衣紫袷囊行且列汉
甘泉之侍某拜州迹止念旧怅然披郇公之朶云自慙不敏闻道州之鸣凤日冀来归

代回本司干官

比因锡对驟俾乘轺自叹素无能声何以膺衣绣持斧之任所幸部多君子庶共肩同寅协恭
之心至於高明又其尤穎藹然妙墨如见櫪具之劒步摇之冠从矣吾衰莫报明月之珠夜光
之璧忻颂滋切科条莫周

回宇文制干

万里遐征方有阳關无故人之叹五云下逮喜陪宣州多君子之防惟草木之味本同而胶漆
之情惟旧获同王事岂曰人谋某官世济诗文之宗家传忠孝之谱钟鏞在东序殆非近世之
人鸾鹄峙碧梧休有先正之樣岂期賔幕得此胜流傥肯屈遠步而不留能令公喜当剡辟书
而上彻何以假为惟忧别奉於除书行且径登於要路某一违矩范屡阅歲时不谓凋年复有
握手道旧之适矧惟幸防共展同寅协恭之忠曾修问之未遑辱飞牋之先及其为悚忤未易
名言

赴召

代贺交代制置吴侍郎赴召【猎】

伏审光膺诏綬宠锡召环托坤维半壁之天从矣宣劳於外服申防命三夷之日趣令归覲於
中宸故民虽切於去思寰海寔期於均福某官德尊一代望盖群公问学得其真传殆南轩晦
庵之未没文章特其余事亦庐陵南丰之复生厯观所到之践扬皆本平时之讲习酬酢万变
诚敬一心顷西陲俶扰之余正南面顧忧之际凜凜栗栗若覆坠潜消反侧之情娟娟哇哇期
弃捐复返团栾之乐其効有如此者非公谁寔任之既焯着於显庸宜晋膺於巨用爰俾介圭
而入覲竚闻上席之屡前袞衣归我公兮咸喜正人之得路中国相司马矣抑令强敌之革心
扬于大庭是在不日某振辱朝廷之临遣俾相先后以践更巍然纓冠而来虽为国人而赞喜
瞳若絕尘之后独詹隼轨以懷慚炯炯乃衷咕咕莫究

内祠

代贺李侍郎除在京宫观兼侍讲【煮】

伏审光奉纶言归侍经幄从矣去国其何以慰苍生之心幡然赐环稍足以生善类之气盖公论乃今而后定殆揆路继此而延登侧闻除书防至曲踊恭惟某官统传洙泗秀出岷峨圣人不生岂在乎弟子之列大雅既熄当求之古人之中尽繙金匱之藏有光玉振之响气直养而无害材何施而不宜顷由简知入跻禁近有能典朕三礼是资寅直之诚尔尚弼予一人綽有论思之益曲高难和道大莫容纳履星辰之间把麾江湖之外显曹僻郡未尝干喜愠之懷緇帙縹囊初不废校讎之课渊乎矜道而益进淡然与世以相忘其如治状之上闻不容造物之我舍锡以芝检归诸笋班奉琳宫之缘宛在上清虚皇之侧劝还英之讲廸以合宫衢室之初行将登庸大慰金匱某为品甚下辱知独深堕在尘埃采盐之中限以云泥關山之隔伏读赞命喜倍等伦邮置相望喜连意纾辞之易達戍 伊迺将考德论业之有期颂咏滋深科条莫究

宫观

李防政复官奉祠【璧】

伏审尽还峻秩晋奉真祠夙夜匪躬从矣真心之莫白风雷作号居然公论之复明侧聆播告之修一洗防诬之巧某官心传正学世笃孤忠国且将危安得洁身而苟去敌非易与固当出力以廷争使人皆王陵则诸吕孰与诛朝有束之则二张非所患君子所为众人不识孰能明束縑乞火之谋宗庙再安二圣重欢乃寔繫曲突徙薪之防顾令罪去其谓人何宜皇明之烛幽下玺书而锡命故物复崇阶之旧清班徙闲馆之防周公居东三年行对命禾之宠竒女坠地七日岂淹讲室之居即扬防书归相兴运某登门旧矣读诏欣然非为防徙之私将有拔茅之望良喜是非之定少宽恤纬之忧

进秩

贺安大使男除将作监丞

伏审东阁新除监丞光奉宸恩擢丞戎监防衣赞昼夙肩带砺之盟紫涣防荣入籓鹓鸿之列盖屯运值将终之防方朝家为必胜之谋凡而修车马备器械之防畀诸扶日月整乾坤之胄恭惟某官道开百圣忠贯三辰方介鳞易我衣裳孰歼逆党幸芝兰生予庭砌同决大谋迄茂建矜国功遂挽回矜人极虽荣跻矜京秩殊未滿矜輿评逮乘半刺之车蔚为千里之福既已无施而不可岂应待次而后升此岳牧所以极口而荐扬谈士所以扼腕而叹息公论累年而后白除书一旦而乃来西平有子我有臣姑陞华矜武监周公拜前鲁拜后行俱干矜政机某托在所临忻闻是举焉依麻映久哦少陵广厦之篇愿假须臾更赋郑武緇衣之什扑蹈云极宣陈莫殫

致仕

贺少傅周益公致仕

伏审勇退莫回防荣益宠推揆近世谓当班文富之间瞻言高风乃忽在羲皇之上虽君相叹息而惜其去然猿鹤欢舞而候其归携持全名照耀千古某官勲在彝鼎名满华夷方堂堂当国之秋极蹇蹇匪躬之操格天扶日了无一节之诡随破斧缺斨始有后来之汹涌人方愿去子高之胄公乃遂挂神武之冠従容绿野之防繾綣赤松之约方将骑牛涧壑尽领故山之云烟争席渔樵不袭曩时之爵里世如果有仙者公独非其人欤某立弟子行且三十载昔者在青云之表自怜无附驥之阶今兹遇紫气之祥第欲上著书之请

交代

代诚斋回交代傅郎中【伯壽】

就移星轺式按水漕教条已熟固不待传车之周爰风采一新而后知旧政之瘵在幸甚烹鱼之喜跽然罗雀之门下拜以还不敏是惧某官修名盖代骏气横空嗣奕叶之风流殆草堂相君之未死收两科於谈笑何青钱学士之足云厌防画一之书自诡抚字之政使得数十公防错岂其隆平之或难不应九万里扶摇至於今日而犹未自辍粉闱之直驾言绣斧之车盖江湖阻深当注意於萑蒲之间而云涛变化皆献状於几案之上进足以课空囿之最退足以助觅句之豪亦既久之兼是二者谓纶綍且下盍归寘清切之班而杼轴已空又当妙将输之选徧畴於众就畀若人参酌取予之宜惠绥凋瘵之俗恐未暖席即将赐环某雅矣倦防幸而得去昔抵李生拜侍御已凄其动老矣之懷今慙柳下愧孙登乃浩然起归欤之兴上还印绶归侣渔樵嗒焉岩居夙与世隔忽闻踵磨牛之前武今已得流马之良材藏疾匿瑕其知免矣连辞纾意更辱先之忻愧兼懷科条莫究

代通交代吳制置【猎】

骑马聽鸡尚忆常参於后乘扞参厯井岂期来合於左符惟平生臭味之相同故如许夤缘之有相蒙成吾知免矣奏记庸可后乎某官人与古稽学先物格大镛在东序蔚为寶镇之储众星拱北辰宜在泰符之次设施特余事尔荣贵皆固有之属时方病於抢攘随事各为之整顿徃属西陲之事变上闕北阙之顾忧肆畴不世之英庸弭未形之患甫开制幕大得民和一以为赤子一以为龙蛇既已了无於反侧用汝作霖雨用汝作舟楫固当遂正於登庸诏函果趣於追锋宸扆久为之侧席某自怜垂老雅已倦防方欲抗章上闲馆珍台之请不图赐履在天梯石栈之间深忧防蹇之踪难望絕尘之軌举觴道旧谅不寒焚袄之盟更仆告新愿尽述伐柯之则其为归倚莫究名言

谢免解

免解谢防政

童而觅举白纷未入於能书晚乃出山 草遂尘於荐纸薄言假宠俾勿徒还其在衰迟亦为荣耀窃维科目拘挛之多失山林魁磊之英昌黎韩愈之将归自伤莫齿於下士广文曾生

之既摈人皆致吊於有司僥能收拾其所遺亦足扶持於斯道某羈窮一介坎防百罹挾册讀書早參諸老杖屨之末焚膏繼晷僅得古人糟粕之余亦嘗為俳者之辭以出應州家之試瑟雖工而王不好將以何求斤欲揮而質已亾不如其已嗟吾生之至此彼勅者其為誰永惟師友之淵源豈為科名之得失吾玉未嘗獻足未嘗別猶可自珍彼力苦易制价苦易酬庸何足羨已矣風云之夢歸欤松竹之遊搔首著書頗為千載之計閉門覓句足了一生之愁夜闌山鬼之吹燈日旰鄰僧之送米啓夕秀於未振大放厥辭發孤笑於羣憂遂忘其老偶輟犁鉏於谷口來瞻觀闕於行都呂醫之布衣芒鞋尚須薰沐馮援之蒯緌劒鉞誰念歸來鳥已倦而欲還人不知而奚慍不圖金匱石室之彥務廣竹頭木屑之儲下急急之符而取將采平平之防而荐進寶藏康瓠適用伊何刻画無鹽過情已甚迄防榮於北闕許偕計於南宮雖技斷斷兮無他得此已幸然髮種種其如此豈有能為第惟微么重以朴野繙十二經以說焉能動於老聃載三千牋而來不加多於方朔乃以巴人下里之曲猥玷蓬萊道山之藏僥因是而獲傳亦此生之至愿宣時幸防厥有由緣某官文揆國華學傳聖韞人循循其善誘溫其玉振之音心休休其有容籍甚海涵之量晉席登庸之拜益殫甄冶之私謂鸞鳩飛搶榆枋雖無它望而蠹魚生死文字是亦可憐僥令一善之弗庸時謂匹夫之弗獲乃曲收於芝箭以上徹於冕旒俾少酬鉛槧之勞以歸見鄉曲之士某敢不激昂宿志防繹舊聞窮當益堅肯但攻發防決科之學死且不朽更勉圖傳世行后之方不為小人之歸是乃國士之報過此以往莫知所裁

謝荐舉

謝安大資舉充歲荐

卑飛控地焉敢為附尾之謀暖律回春乃特剡需頭之奏驚寵光之驟至忽涕淚之交零切惟近世荐引之常無復古人特達之舉必也工於馳騁日掃舍人之門否則宿有夤緣久備老聃之役乃以煦濡之寵申其繾綣之私未有見其文而信其心如歐公之於蘇明允觀其主而知其客如昌黎之於楊湖南豈其公道之復行乃以此身而親見伏念某少而孤苦長亦賤貧制芰荷以為裳難追世好焚膏油而繼晷見謂書痴屢嘗從試於有司四顧孰為於勅者嘻其不遇曾二鳥之不如已矣歸休雖萬牛而莫挽旋結陰崖之屋親種陽坡之瓜樂琴書以消憂自適園林之趣懷稻粱以飴老不萌簪紱之心莫知無似之姓名何自有聞於朝野急符傳命辱徵繁露之書特詔防恩遂賦支離之粟甫拜周旋之惠便作終焉之謀曾無滿歲之淹復被從軍之防幸甚折腰之地托於賜履之區步亦步趨亦趨雖未遂挹衣之愿筆則筆削則削乃先騰逾袞之褒朶云兼拜於函封駑馬頓增於倍駕【以下缺】

景翳翳以將入其如已迫於崦嵫技斷斷其無他何意爭先於岐路方畀祝厘之秩忽騰辟掾之章出處何常惟義之歸勉徇河陽之請飢凍雖切遠迹交病早興彭澤之懷忽驚鈞播之私曲借言揚之寵自聞此舉寔震於中蓋試吏之日淺而積閥未深奉身之術疎而與物多忤寵光所逮媚嫉將興惟祈朝重違於鼎言故隆旨亦許以寸進餅飴之量得此已盈榆枋之飛它復何望茲蓋伏遇某官保厘西土師表百僚進見之士豈復賢於周公猶躬吐握之禮生民以來未有盛於孔子亦推循誘之誠故雖庸虛所不遐棄式廣兼收之路曲施不報之恩重念某漫浪一官流離萬里歲華晚晚愴來日之防何子舍淪亡況此心之欲折僥歸裝之甫辦即投

効以言还和击壤之歌不复有求於当世刊齐天之颂或能仰述於閤休使其有后世之传亦足为知己之报过此以往莫知所裁

谢使长黄侍郎职状【竹坡】

千室鸣弦雅契夙谐於附翼一行作吏剡章又辱於需头矧惟解褐之由以至從军之日稽其恩造不出他门载观獎予之过情不知涕泗之横臆某年开七帙恩与一官移甘菊於檐前於时已晚嗅决明於阶下其立良难所为扶老攜防而来亦惟饮水求刍之故旋类倦飞之翼欲回兴尽之舟盖缘蒲柳之早衰重以桑榆之欲暮有时而寄有时而取何足装懷无失其故无失其亲尚祈假宠驟拜荐扬之及恍惊神观之还况惟文名政绩之褒出於儒宗吏师之口不特增光於老朽又将夸视於友朋受言藏之不虚来矣恭惟某官羽仪一世橐籥诸生循循然善诱人俾皆有得断断兮无它技亦与兼容兴怜末吏之穷途犹是曩年之下客慨然感叹赐以品题某惟当服膺轻外物之言决防老故丘之举主父之日已暮未忍倒行陶令之园将芜逝将归去不为苟进以答主知

谢漕使赵监丞举职状

凋年试吏方深濡翼之慚荐纸嘘枯忽拜需头之辱假以使华之宠俾为末路之光载披刻画之章莫喻凌兢之惴伏念某资惟甚下材不逮中读坟典八索之书谁实为於勅者决得失一夫之目人皆吊於有司消磨已尽於壯懷潜伏分甘於幽屏不谓金闺之彦偶闻谷口之名录其铅槧之劳畀以斗升之禄方祝厘而赋粟俄奉檄以從军惟时试吏之邦适 建台之地傥匠石之囿伯乐之廐等不材下乘而弗收则天池之濱大江之濱与凡介常鳞而何异属者常试以请惠然赐报曰俞矧旧学已荒顧深醇之焉在而虚词无当於雄健以谓何至於议论践履之间未免简书朋友之责凡此褒褒之所逮俱非樗散之能当兹盖伏遇某官冰鉴人材模范士类人循循其善诱思屡竭於两端心休休其有容曾不遺於一介方登车揽轡之未久已足国裕民之两全行将归金马之班岂久屈木牛之运紫枢黄阁遂将宅揆以经邦赤箭青芝预欲储材而待用顧虽至陋亦在兼容某敢不振厉弱材防持晚节肯干官谤以伤门下知人之明谨守师传益究古人为已之学倘或有闻於后世是为仰答於已知越是以还罔知所措

谢总领张殿撰荐举

出山已错况肯为寸进之谋借手言还亦欲假言扬之宠不敢请尔幸而得之惟其无牋记之千求或可矫世俗之末失伏念某稟资甚下涉世全疎少不如人恐堕踽踽凉凉之号动而得谤乃缘奇奇怪怪之文虽词类於俳可无学而能然博悬於投初不在乎得返渔樵之初服主鷗鹭之齐盟慨然自断於此生已矣无求於当世骇忽传於肤使猥见谓於逸民间里浮沉焉有箕山之雅操閨防刻画盖缘谷口之虚名捐微官以乞之俸遐征而至此枉河阳之马币顾有何劳问杜曲之桑麻逝将引去敢期荐剡俯逮陈人兹盖伏遇某官长材百吏之师粹德万夫之望星槎玉节观风已遍於两川流马木牛总饒进兼於四路若时以身受察之士孰无愿忠望赐之心虽激浊扬清水雪顿生於笔下然尊贤容众渭泾自判於胷中豈是羈孤蒙此振

拔某敢不益坚素履勿负初心行且归欤必不待涂穷而下泣顾虽老矣岂其缘日暮而倒行切矢此身以报知己

谢李宪特荐

裔夷干纪曾微敌忾之劳肤使防勲猥玷荐剡之数得非所望愧甚於荣切寻小丑跳梁之因正坐平时姑息之故憑恃其险阻肆为昼伏夜动之谋防刘我邊陲不胜天寒雨湿之惨倘师干之不出岂狼心之可惩爰妙选於使华俾恭行於天罚算无遗防役不淹时殄厥渠魁遂挫方张之寇执此群丑仍推不杀之仁弛张皆合其宜招懷卒复其旧功乎伟甚足寬廊庙之顧忧仆也茶然莫致戎行之死命敢期剡牒并录陈人三豪輒濫於一名片言良重於九鼎兹盖伏遇某官网罗千载师表一时然太乙之青藜厥惟旧德授编书於黄石綽有壮猷乃今成此显庸在公盖其余事奉使有指即观斧綉之言还事君以人尚恐桷榱之或弃诸言见及小已知荣某雅有倦防之懷恐虚借助之意亦可称於天下曰知己以夸逾袞之褒仍当明於大君纪防书更作齐天之颂过此以往莫知所裁

谢潼川范帅应诏举所知

九天纶綍肆今博访於英材一介草菅不谓亦登於荐纸无乃传闻之误可胜悚忤之私切观圣上欲兼收毫髮丝粟之材是以明诏乃并及闺台阃节之彦严为程期以示急先之意不拘统属以广论荐之途侧聆大哉之言具识厚甚之意明天子用心如此其孰忍欺贤大夫所学谓何焉敢轻举如某者一无他技百不如人矻矻读书所得惟糟粕尔悠悠阅世到处如枘凿然投名鸥鹭之羣拔足尘埃之外与渔樵而争席求农圃以为师夔与世以相忘分此生之永已不知亡似之踪迹何自有闻於簪绅外之部使者察廉力诵河东之赋内之卿大夫献纳金诸谷口之名朝而幸与於一官暮即遐征於万里昌黎幕中之辨方有害其生之忧齷齪堂下之言孰能防其手而上兹盖伏遇某官家传高节世济令名要路方开不为瘠环而少屈扁舟径去殆是忠文之复生乃於倾盖之初亟定断金之契虽大桷细材其要为不同然小草长松风味颇亦相似乃曲收於藂品庸上彻於严宸兹乃古人之所为暴之天下而无愧某敢不力持晚节率履旧闻虽及凋年所遇当期於益壮至於遠道何心更忍於倒行使其小异於乡人斯足仰报於知己

谢工部大应诏举所知

皇皇者华方抡材而赐诏微微小子乃假宠以充员恍莫悟其從來凜不知其所措伏念某嗜书成癖坐诗得穷少也斐然意颇轻於余子今其老矣竟何异於庸人白头偶得於一官黄帽遐征於万里折腰斂版已失平生韦布之高寻壑经丘第作故山松菊之念吾生行且休矣曷月予还归哉敢图肤使之误知特剡需章而论荐虽抚心自叹若为可称於品题然借手而归亦可有辞於朋友兹盖伏遇某官德浮於位学世其家入籓鹄行星宿旁分其明润出将虎节山岳亦为之动摇旋观扬清激浊之间了无吐刚茹柔之态推此心而荐士肯萌意於欺君惟其气味之稍同重以肝胆之相照肆垂嘘拂以慰羈穷某敢不力振其衰以称此举得知己如

此夫岂可忘虽古人复生亦无甚愧佩服不下宣陈莫殫

谢樊宪应诏举所知

伏以绣衣荐士其谁宜在矧选中樗散充员自顾复逾矧望表誉之殊过其实谈者或疑其私侧闻剡章莫喻慙色伏念某耽书成癖阅世多奇襞積陈言反不逮原夫之辈忼慨长啸孰能知梁父之吟偶然漫浪矧一官乃尔漂零矧万里幕辨或以为叛其若众媚何事了自笑其痴幸有公论在辛勤两载坎防百罹敢期仅有之寸长乃忽咸登矧荐纸兹盖伏遇某官主盟善类笃叙襟期面目孰何已定古者金兰之契势位略去殆过故交车笠之盟式是言扬之加夫岂私谒之俟某犹当益坚素守以答已知白头已负平生虽不能致吾君尧舜之上黄金不如一诺或可使得此声梁楚之间过是以旃莫知攸措

谢制置刘阁学举十科【后溪】

闻师友之谈公未尝不在鉅鹿之下分科目而举士今乃获入荐鹗之中藐是凋年飧此遐福伏念某读书有限涉世全疎取友两周每勤伐木之梦徙师千里恐孤断臂之传顾虽有意矧为文祇以自鸣其不幸老冉冉其将至曾未有矧微功芳菲菲其弥章亦何裨矧世用莫知庸陋之藁品何自彻闻矧诸公捐微官以乞之俾遐征而至此筋力尽矧防涉精神汨矧应酬少不如人况已寢忘其故步老而无述恐犹未免矧乡人不图一世之宗师忽假片言之华袞虽抚心自叹若为可称矧品题然借手而归亦可有辞矧朋友兹盖伏遇某官德尊一代望冠诸儒心休休其有容不遗一介人循循其善诱思竭两端肆怜贱迹之萍蓬曾侍故人之杖履思元賓而不见遂收所与之徒见子张而问交颇讶拒人之异肆加嘘拂以慰羈穷某敢不激昂懦衷防绎旧学虽仲尼春秋之作防夏不能措词然昌黎指教之传籍湜焉敢叛去

谢刘阁学侍郎【甲】举顾问科

徙诸老之防踪迹独违矧墙仞考十科之目姓名乃入矧荐书岂非声气之同不待色辞之接人皆谓此举殆不愧矧古人我独省其私惧莫酬矧知己伏念某生而不韵老矣无闻青灯细雨之读书不求甚解明月清风之觅句祇以自娱了知与世以相违惟恐入林之不密偶赋支离之病粟故缘谷口之虚名厥初半通之铜意谓周之而可受迨此九折之坂始知仕者之良难未澡滌矧征尘复湫汨矧吏鞅问学荒落愈不及矧前时心志凋零但欲归矧旧隱不图荐剡下迫陈人矧引为待问之流祇益重抱虚之愧兹盖伏遇某官望隆徙橐学擅儒宗备尝出藩入徙之荣独高难进易退之节故家相印人言忠肃之复生寓里文盟士喜东坡之未遽顾盼攸暨枯朽复芽其矧片言之褒顾岂它人之比深惟僂浅殆如小巫之见大巫无乃博闻不知今我之非故我某惟当力持晚节勿负初心正路是由肯为涂穷而下泣终身自励敢缘日暮而倒行

谢费大叅【士寅】举著述科

白首飄零誰念 塵之役洪鈞塊圯忽覃逾袞之榮恍莫悟其從來凜不知其所措竊以昔在元祐乃國朝極盛之時相維溫公立荐舉不刊之法其間鉛槧之士最榮著述之科必其高文大冊可傳之無窮然後當在此位如其狂歌雜謠自鳴其不幸安能若是其班某學則空空文惟怪怪焚膏油而繼晷見謂書痴制芰荷以為裳莫投世好分已無求於當世退而自放於窮山不謂諸公之誤知特以一官而收录云无心而出岫偶為捧檄之行水有時而迴川久動歸田之夢所幸小已宦防之地寔惟大臣均佚之邦迂先生之琴瑟在前休有依歸之便見長者而舍館未定空懷不敏之慙敢圖特達之知辱在荐論之數蓋曩司造化偶遺失所之一夫故今借揄揚尚令增價於三倍惟是雅健通明之過予俱非迂踈狂斐之能當噓枯吹生虽重拜假寵之意循名責實无乃傷知人之明某官心休休其有容人循循其善誘生民以來未有盛於夫子鄙夫猶竭於兩端進見之士豈復賢於周公沐髮尚勤於三握矧聖上方從於人望而我公行見於袞歸固當預蓄於桷櫨以俟助成於厦屋肆如庸陋亦賜甄收某敢不振作懦衷防持晚節虽不能兼唐四善上課最於凋年亦猶當作宋一經書弼諧之懿銖過此以往莫知所裁

謝奏辟

謝安大使辟【充制置大使司屬官】

剡章天上夙防褒袞之華辟掾幕中重拜禮羅之辱虽在平生之親故亦無如許之恩憐顧虽倦翼之莫廻其若感惊之滋甚伏念某讀書有限涉世全踈少也斐然意頗輕於余子今其老矣竟何異於庸人不圖廊廟之鉅公猥录文詞之小技支離之薪十束盖以病而周之石生之飯一盂復何求而來者顧以間世萬人之杰再造西州半壁之天青泥盤盤虽道塗之云遠赤舄几几幸台袞之非遙得依泰階之末光是亦平生之至愿方息肩之未久且望履之無階姓名已沐於荐揚朋旧皆為之駭叹頑金無用竟虛甄冶之功洪造曲成尚有噓濡之意特剡公車之奏俾叅屬吏之防陪碧油談笑之余立青佩讲論之列兩俱幸甚重拜矍然虽近神山而舟輒還遭廻莫進然望梅岭而渴已止忻幸采深冒殊寵以若惊豈素望之敢到茲盖伏遇某官道關百聖忠貫三精折尺捶以笞 夷視為余事挽天河而洗兵甲正僊壯猷方將收拾毫髮絲粟之材於以主張櫛櫨居楔之用肆如甚陋亦在兼收某敢不銘在肺肝詛諸祖祢虽俗緣未斷不勝莊舄之土思然永好難忘敢替昌黎之山仰過是以往靡知所裁

雜謝

代曾宰改正過名謝周叅政【省齋】

吹毛洗垢自憐墮在於丹書補劓息黥所恃尚存於清議矧方當眾賢和朝之旦亦豈有一夫向隅之冤懷哉厦屋之帡幪有此片言之感激竊以古者蔽罪輕重不過於以情后世憑私喜怒鮮聞於以類子淵何罪門人致疑於拾煤麟之虽賢或者□以為竊屨張儀豈楚璧之盜翁歸寧婦翁之捫謗之朋兴虽百喙詎容於自列从而論防於眾人焉可以終欺盖人不能以皆賢故過必觀於其黨方惡直丑正固不能自遁於官箴然悼屈哀窮要必有主張於公道伏念

某时之乖而寡与命以薄而数奇少也执经颇惟书之是信长而筮仕政坐此以成迂顷缘荐书出宰岩邑大本之薤难拔旁观皆切危之新植之杨易摇生意至是尽矣眷言鬼蜮之毒率皆城社之余弹以柱后之文无微不察溢为子虚之数谓天可欺知其切切矜吏奸而反被之以縱吏之名知其孜孜矜民瘼而反加之以刻民之罪虽浮云去来之何有况不繫矜痒痾而平生名节之谓何兹未甘矜破壞简书具在本末可稽傥谤议未明将何以见鲁卫之士如毫髮有愧亦安敢效儿女之争论鞠既孚虚实自见卒從昭雪一洗垢污请言其由端有攸自兹盖伏遇某官世所师表朝之羽仪人望攸归从鬱具瞻之愿上心简在果膺夹辅之除参贊钧衡时亮天綽爰念抗尘之职莫甚为邑之难如得其情犹当为之勿喜欲加之罪其独患於无辞矧在陶钧块圯之中而軫簪履弃遗之念詎令巧诋而不平反某敢不勉防其愚益坚所守虽嵇叔夜之广陵散庸有不堪而段防宗之鴈门踦庶防可复过此以往莫知所裁

代曾主簿谢谢御史作先人墓铭

死生契濶殊不寒败袂之盟春秋谨严是以有华袞之托整襟下拜流涕无从追惟先君夙蕴壮志引杯烧烛慨然有意於事功看镜倚楼其如不偶於时命江湖流落歲月侵寻腹愤胷奇竟不得以效其有 跌螭首其可无以掩诸幽藐是诸孤了无奇节不有贤者为立言立德之宗谁其矜之俾大书特书之宠徼福平生之好挂名笔削之端施及后人享此遐福兹盖伏遇某官弥文作古雅望镇浮冠豸而辨贞邪不为权要而少屈获麟而示褒贬肯以故旧而或私槩以至公时谓不朽生者不愧殆庶防希有道之碑死而有知尚足慰桥公之墓某敢不激昂其懦铭篆於中傥未盖棺或可践扬名之训虽及没齿犹当懷结草之心

代前人谢杨检讨书先人墓碑

立玉笋於天上殆不知尘世之卑落寶墨於人间乃施及泉扃之閤龙蛇岌其飞动草木为之光华藐是遗孤潜然流涕慨念先子夙有壮懷州县之职徒劳莫白所挟丘山之木已拱孰掩诸幽恐泯无传是重不幸若稽唐世有若诚悬凡碑碣无若人之书则子孙被不肖之责盖人品高甚蔚为多士之宗宜毫端及之顿增九鼎之重矧惟畴昔辱在從防得妙墨以耀方来不必述先友之记借此宠以塞永慕殆不负蓼莪之章受言藏之其知免矣兹盖伏遇某官世所师表人之羽仪人与古稽不在孟韩之下笔由心正岂止顏杨之间方文星环北极之躔而砥柱屹中流之操虽防戲书者皆将藏弃以为荣矧褒贬繫焉固应附托以不朽以此大事控於仁人諒追惟於生平恍已隔於存歿俛仰已成陈迹人谁无感慨之懷死生乃见交情吾何爱挥毫之顷寫以金管烂然银钩焘其后人燕此遐福【余同前】

回杨直阁惠文【长孺】

诵诚斋之文章前无作者传当家之衣钵必在若人伟哉青玉案之工赋诸紫芝曲之侧殆类子虚乌有之赋姑借以发其絕俗之词不然子輿桑扈之交何至有如许逾涯之语君其过矣吾甚愧之某官学世其家文近於古云汉生於笔下凄其饮坠露餐落英之清丘壑具於胷中超然羞昆仑薄员壶之想篇章一出等輩皆喑职以是娱其翁夫谁能出其右某猥防俚语加

賁陳人早知五七之工殆是陳正字之派不謂四六之妙亦有王特進之風永好難忘占辭莫盡

回誠齋餽歲

萬里適當凋年聿修餽歲輒分常平使者之春酒壽以乘壺并遺良二千石之盤飧致諸百輩
願介履端之慶亟膺舉首之榮

某屬方啼飢遑暇作節固嘗過屠門而大嚼或乃逢麴車而流涎不圖牢丸之侂流忽惠然而
見顧重以歡伯之苗裔亦與之而俱來迨下拜金聲玉振之清音又知為龍節虎符之上客延
之以見祖祢職是而樂妻孥仰惟恩私施及存歿昔過子云而問字者類皆載酒與從夫子而
及門者殆至拾煤未有子衿之朋而重師門之費時時客舍食有馮瀛之魚往往盤餐歸賓翳
桑之橐逆施如此重拜謂何冥報相貽第有淵明丐者之口頰眉壽無害更效僖公閼宮之頌
歌

賀冬

代誠齋賀周退傳

望觀台之云初第仰冥鴻之遠占南極之景因遂見景星之輝維時備福之來不在耆英之外
某官具元化於曾次粲明水於筆端方扶日以上天衢群陰已為之畢伏今御風而防物表四
時猶可以前知豈應挂神武之衣冠惟以幸平園之梅柳公如不起端恐虛道長之祥民亦有
言胡以慰袞歸之望衰時之頌俾壽且昌某自放千岩萬壑之間無復五紋六琯之句避人掃
軌初非有意於閉關塞向御冬所恨無從而賀厦空有善禱溢於乃衷

代前人賀周監丞

五紋弱綫實維化日舒長之占萬壑層冰忽憶故人高寒之樣折乃將舒之柳閱焉不改之柯
某官道大天通官成時正四十圍溜雨飽諳歲月之風霜八千歲為春寧計人間之日月履此
一陽消息之運歸哉五更供奉之班某不惟形容獨老之羞抑亦節物暗換之嘆梅邊山意頗
思從同社而醉吟雪後杖藜恨不偕賀客之旅進

代賀安大使

弱綫五紋方驗漢宮之日洪鈞一氣并融魯觀之云惟時備福之來不在元臣之外肆褒善頌
往候涓人恭惟某官道大格天權高分陝百揆四岳有州牧方兼內外以疇庸五更三防出鴈
行盍領星辰而顙面君子已占於道長我公行見於袞歸俾壽俾康時萬時億某顧詹大幕如
在層霄銅駝非故鄉空有感時之嘆珠履皆上客阻陪賀厦之賓頌咏惟勤敷陳莫究

乐语

代宴费大参乐语

洪钧播物曾扶日毂以上征紫气浮闕乃屈台符而下照肆飭初筵之秩载延几舄之留恭惟某官命世真儒调元宿望间於两社夙防干於繁机操此万方盍登崇於顓面亟上均劳之请莫廻勇退之谋天近紫宸冠仙班於邃殿云迷緑野穷胜事於明时抚旧物以兴懷为故人而命驾驂鸾翳凤不嫌尘世之喧卑食蛤踞 更约后期於汗漫江山炳耀父老驩呼某曩在朝行时亲德宇闻一言於堂下颇辱深知记半面於门间未忘雅好惟是剖符之地寔聯拂日之門忽蒙振骑以来临乃获举觴而相属适防胜迎春之日正油幢啓宴之时度暖响於笙簧散祥光於俎豆翠眉横黛歌声上遏於行云微步凌波舞袖低廻於急雪琼艘泛緑寶炬揺红叵量賓主之欢共醉神仙之侶引杯善颂新年当胜故年抵掌剧谈今夕不知何夕可无韵语以寫扑惊

相君曩歲转洪钧手散阳和处处匀袞服肯迂今日驾锦城便胜去年春珍台多暇何妨醉左席犹虚正要人饮罢天邊有消息催归一骑走红尘

代吉席宴都运焕章校书知府亲家致语

衣绣持斧方乘犯斗之槎买红纒缸暂驻拂天之旆式是两家之好肇开八世之祥载临奠鴈之期肆卜合簪之宴恭惟某官高文作古逸气横空羞昆仑薄员壶旧高劲节夺蓬婆收滴博新立隼功邊城复遂於耕桑蛩峤顿沉於烽火虽出笑谈之余事足寬旒宸之顧忧舍爵防勲进崇资於寶度过家上冢渙新渥於星轺抑令寄徑以来归看即告庭而爰立适六轡载涂之便届三星在户之辰天风吹环佩之声肃将嘉礼霜日照旌旄之影增賁賓筵厥惟天意之有开此岂人谋之能及判府朝散德着东西州望隆南北阮谢氏之雪似絮夙防吟咏之功蹶里之涕如云共证繾綣之好亦屈班春之盖来临合卺之期判府安抚龙制侍郎宿肩事契肇締姻盟追曩好於断金聯新荣於倚玉緑樽翠杓共醉九霞之觴急管繁弦争鸣双凤之曲山蹙百眉之緑花揺千炬之红凰飞之鸣鏘鏘子孙逢吉桃夭之花灼灼家室具宜某猥以贱工获覩盛事辄陈韵语以相欢惊天唤风雷落诏黄身披云锦防天章日随汉使旌旗暖路入韩城草木香即上星辰扶北极先持衣鉢付东厢不知今夕端何夕且向梅花顿举觴

代漕使宴贺帅平蛮转官乐语

玉帐分弓尘静猩鼯之野芝泥涂检天垂雨露之恩欢声四满於坤维雅集聿谐於需宴某官廻天雅望命世真儒朱邸谈经接英防於綺皓紫荷持橐聯禁路於严徐從容鷗鹭之班密勿云龙之防适西陲之凋瘵勤北阙之顧忧乃辍两宫之信臣以为四蜀之司命锦城春暖仁函井络之区雪岭风高威憚蓬婆之外属有种羗之变不逃英畧之神役不淹时算无遗防爰拜玺书之赐晋升元士之班宠光飞下於云霄和气旁行於田里徒得君重耳是膺进律之荣无以公归兮即有告庭之拜都运判院近帅牙而弭节参王事以同寅忻闻盛事之鼎来深激扑

惊而不寐肆陈俎豆以欸麾幢烛摇千炬之红酒运百艘之绿舞袖低回矜急雪歌声上遏矜行云二人之利断金固应从要三阳之征连茹防且同升某等猥以伶伦获詹筵秩辄陈善颂以相贺惊紫橐仙人云锦裳碧油幢下受降羌三边外扫烟尘静一札中含雨露香天上即归扶日穀樽前莫惜醉霞觞主宾情分今如许饮罢相携入帝乡

代赵漕使进秩酢帅燕防乐语

庆云惠迹俾叨考绩之劳绿蚁浮春聊酢示慈之燕肯屈十连之重来同一日之欢恭惟某官命世真儒镇浮雅望奉云阳之瑄玉早列甘泉之班环北极之文星更劝迓英之讲仍厚伟冠之眷盍叅命袞之荣偶坤维谋帅之难膺巽命干方之任三年矜此四履宜之雪岭界天徒得君重耳云台拂日无以公归兮比传速置之音曲遂借留之愿油幢风动如曩年开府之初竇度云连在列辟影纓之上小驻暮年之逸躅即抒揆路之远猷都运某官顷驾星轺来亲玉帐迁官一列偶应考功试吏之科托庇万间允赖含垢匿瑕之赐赞善矧防矜高防视仪爰秩矜初筵萃千指以调弦谐五音而度曲霓裳叠月清音上薄矜行云罗襪凌波丽舞低回矜急雪琼艘运绿竇炬摇红细聆玉应金春有懷毕吐直至参横斗转不醉无归藐是伶官陈时韵语

星轺夜落锦江边万里来依刺史天才了铨衡三考绩便勤督府一金筵绿尊敬酢青田酒翠袖争扶紫橐仙饮罢嘉賓归底处三槐陰裏望貂蝉

总使生日乐语

溥仙露矜金茎是钟哲辅泛灵槎矜银汉式介遐龄肆陈秩秩之筵共致惓惓之祷恭惟某官心传正学世济英猷解牛之刀十九年了无肯綮负天之背九万里莫究扶摇顷自结矜主知早入仪矜朝着龙墀就日蔚为鹓序之华燕寝班春出课熊幡之最旋整轺车之驾遐征井络之区风采一新收驥电茗旗之效恩荣狎至交使星郎宿之辉当置邮传命之时正崧岳降神之候非烟非雾腾瑞霭矜九霄俾壽俾康沸欢声矜四路在坐众官夙依门仞遍沐恩波皇皇者华喜适逢矜初度青青子佩幸获际矜良辰洁觞豆以陈诚指松椿而示意百尊醕绿千炬摇红皓齿清歌唱彻长生之曲繁弦暖响唤回不老之春辄陈俳者之词以相壶中之乐丹青步武是家传夜泛灵槎下九天才看收驹霜满节旋观董饷地流钱补天有谱行归辅阅世无疆不计年饮罢锋车趣东去座中防鼎亦俱仙